



En regurdientscha da
Maria Di Bella – Albin
1936-2013

bb- Ils 15 da zercladur da quest onn ei morta a Tschamut Maria Di Bella-Albin. Tgeua sco ella ei vivida ils davos onns eis ella era morta. Per mei che astgel scriver entginas lingias en sia memoria ei quella nova vegnida pér cura ch'ella ruasava gia o sut sogn Vigeli. Gie quei ei stau ina da quellas surpresas ch'ins sto magunar gl'emprem per saver capir e tschaffar ella. Tschamut ei stau per mei in liug cun bia interessantas anecdotas e regurdientschas.

Suenter che la plantaziun ei vegnida plantada si Liets ha nies bab midau maises e ius sin Tschamut. Lu era Tschamut aunc in vitg cun veta. Ils Beer havevan ina ustria lunsch entuorn enconuscenta e recumandada. Il Stiafen Riedi aveva in entira roschadas affons che devan veta, la Clara Riedi vendeva flurs striaunas quei ch'ella pudeva ed ensemen cun siu frar e quinada fagevan els aunc in tec il pur cun ina ni duas vaccas. En Curnera eran ei vidlunder da construir il mir da fermada ed enqual luvrer talian era era secasaus a Tschamut cun sia famiglia. Sco sulet pur da vaglia da Tschamut era il Giachen Giusep Riedi nies partenari sin pastira. Buca d'emblidar il Nazi Albin, impresari e cava crappa che controllava schebein nus pitgavan las vaccas ni buca. Ed odem il vitg habitava la tatta Margheta Albin ed ils Di Bellas.

Igl ei era stau l'emprema gada che jeu sundel s'entupaus cun la Maria. Ella era vegnida sissu che jeu scrivevel diari. «Ella hagi era scret diari igl onn dalla neiv gronda» ed jeu havevel schizun survegniu quel per leger. Bia onns pli tart sundel jeu seregurdaus da quei fatg e dumandau schebein ella hagi aunc quel e sch'ella vulessi buca era scriver empau sur da Tschamut, sur da sia affonza ed il viver da pli baul. Ei era aschia che sch'ins pudeva tier la Maria in bien mument fageva ella tut per ins. La Maria ha dau suatientscha a miu giavisch e scret pliras paginas. L'idea era da saver publicar quellas forsa inagada en la Tuatschina. Denton tuttenina ha ella piars la curascha ni semplamein vuliu saver nuot da quei

pli. Per cletg ein sias memorias screttas aunc avon maun ed ei fuss era la valeta da saver publicar quellas. Siu lungatg sco era il dunn da saver completar exact e la buna memoria fa siu scriver fetg interessants.

Naschida ei Maria ils 30 da mars 1936 a Tschamut sco feglia da Margreta e Giachen Giusep Albin-Riedi. Sia sora Ida era naschida igl onn 1930, igl onn suenter suonda il frar Giusep e 1933 il Nazi, per nus enconuschents sco cavacrappa e l'Augusta igl onn 1934. L'affonza sin Tschamut, il segidar vid las lavurs dil puresser ha Maria descret aschia. «Tuts quels onns che jeu saiel serguardar fageva miu bab il pur. Sulet ils onns che nus eran pigns eis el ius dasperas aunc alla lavur. Quels onns ha la mumma fatg tut persula fein per circa 10 cauras, per entginas nuorsas ed ina vacca. Durent ils onns che la mumma era persula stueva nossa sora Ida star els stadals. Ella era la gronda e fageva la damaun il percasa e mirava che nus quater pli pigns fagevan mintgin siu pensum daus si dalla mumma. Lezza era ida gia dallas tschun ord casa a segar e spitgava sin il solver ch' ina ni l'otra da nus purtava ad ella. Il frar Giusep gidava igl aug Pin ed il Nazi era cavrer. Lez havevan nus da gidar a catschar las cauras tochen enagiu la Pun. Eran nus duas buobas puspei returnadas el vitg prendevan nus la medema via sut ils peis, beinsavens a pei blut. Quella gada eran ils pors vidlunder. Mintga casada possedeve dus entochen treis pors, purschals ni liufas. Sin gl'entir vitg serimnavan aschia entochen varga quendisch animals. Quels vegnevan rimnai sil medem plaz sco las cauras e cu tuts eran semtgai e sesvidai veseva il plaz ora empau sco in lidimer. Denton Tschamut era lu gie in vitg da purs e tut quei era normal.»

Temps da scola: «Cunquei che jeu erel la giuvna hael stuiiu spitgar tochen il davos per saver ir en cumpignia cun mes quater fargliuns a scola. Finalmein ei miu emprem onn da scola arrivau. Cun tgei plascher che jeu hael entschiet en. Gia saver seruschnar la damaun dil barcun pegna giuadora senza che la mumma sevili era enzitgei tut aparti. Igl emprem onn da scola eran nus sis scolars. Treis da Selva e treis da Tschamut. Quater digl onn avon ein aunc vegni vitier, els eran buca vegni promovì per la secunda classa. - Miu scolast preferiu ei staus il Vigeli Berther da Camischolas. In di che jeu erel sin ina caglia giudem ils Runs havevel giu gronda bucca encunter mes cumpogns. Hael lu viu che nies scolast era giu avon scola ed era udiu miu priedi. Bein hael giu schliata cunsziienza. Mo arrivada giu tier el hal mo ris e detg: «Gie, gie Mari, te as ina gronda bucca ain scula, lu astgas era vai ina gronda odado.» Aschia ei mia tema stada calmada.»
Baselgia: «Igl ir en baselgia era nuota schi legreivel. Pertgei treis gadas la

dumengia siglir navenda Tschamut giu Selva era empau bia per pigns e gronds. L'emprema gada la damaun dallas tschun ord letg ed ir a prender penetenzia ed a sepevegiar. Da quei temps dev' ei buca communiun duront messa, pertgei ins stueva esser gigins. Jeu seregordel bein inagada ch'in muschin ei sgulaus en bucca a mi ed jeu haiel prompt temiu; 'ussa saiel buca ir a separvegiar. Mo il bab ha quietau mei e manegiau ch'ei segi buca stau mia cuolpa. Mesa las otg eran nus anavos a casa, ei deva solver e sunter spitgar sin las nov per saver turnar giu a Selva a messa gronda. Quella era liunga; cun priedi senza fin, pir che la perpetnadad.»

Ni l'emprema gada egl jester: «Cun dudisch onns haiel priu per l'emprema gada comiau dils mes da casa. Per cletg ha la separaziun cuzzau mo tschun meins. Aschia ei il sterment staus buc'aschi gronds. Era il fatg che jeu haiel saviu ira cun mia scolasta Matilda en mia emprema piazza ha gidau mei a supportar. Igl ei iu giu Surcuolm tier siu bab e tier siu frar.»

In onn pli tard, igl onn 1949 eis ella en piazza a Vella. Cheu arriva la tresta nova ch'il vitg da Selva seigi barschus giu. «Jeu erel en casa dalla Victoria e pertgiravel ses dus affons pings en stiva. Nus termagliavan giun plaun, il frar dil patrun ei vegnius avon a mi sco in glimari, entrond e stend avon mei cun quest trest messadi. Sia cumparsa gronda e lu la tresta nova havevan fatg gronda impressiun sin mei. Haiel astgau telefonar gia quei mument a casa per saver pli detagliau sur il schabegiau. In temps pli tard haiel retschiert da mia mumma in pac resti dallas «lieben Gaben». Aschia schevan ei dalla rauba ch'ils da Selva havevan survegniu pervia dil barschament. Ei haveva pari tunschiu tochen sin Tschamut. Dil cuntegn da quei pac seregordel aunc bein. Ei era ina schuba bolero, nera cun tachels alvs ed in per calzers bass cun calcogns aults. Quei costum cun calzers haiel empruau gia l'emprema dumengia d'ira a messa giu Pleiv che sesanfla in detg toc sut Vella. Quella tortura haiel fatg denton mo inagada. Haiel giu cletg de buca rumper las combas e pér il tac-tac da baselgia enquei ha disturbau mei dal taliter. Da quels calzers haiel purtau per cun schotg onns la secunda gada.»

Igl ei buca restau cun quellas plazzas egl jester. Finida la scola ei la Maria stada en piazza en differents liugs ella vischinonza e lu era giu la Bassa. A Rapperswil lavura ella sco telefonista e mida pli tard «el service». Cheu el cantun Sviz ha ella fatg enconuschientscha cun Salvatore Di Bella oriunds dalla Sicilia. Il schaner 1964 ein els maridai ed igl avrel dil medem onn era igl εμπrem fegl igl Antonino gia cheu. In onn pli tard arriva il fegl Norbert.

Daco ch'els ein turnai igl onn 1968 a Tschmut fuss interessant da saver
Forsa per ver quittau dalla tatta Margheta. Denton sch'ins ha enconu-
schiu la Maria ed enconuschiu sia affecziun per siu vitg natal ei quei mo
stau consequent. Siu um, il Salvatore ha giu la cuvida d'anflar ina piazza
stablà tier la viafier Furka Alpsu. Per fadgiar supplementarmein empau
daners han els era fatg in temps fein per vender, lu pli tard ha el tschentau
plattas ed aunc pli tard ha el surpriu da better ora la neiv si Tschmut. E
la Maria haveva perfin surpriu ina incarica dalla vischnaunca : ella ha giu
da mirar che las tgauras mondien buca en la nova plontaziun si Schari-
nas. Cura ch'ella veseva las tgauras stuevan ils buobs (bugen ni nuidis) ir
si e catschar naven ellas.

Maria ha viviu ina veta fetg modesta e semplà ed ella ha adina giu fetg
bien quittau da sia famiglia. Sco siu frar Nazi havevan els vieti bugen
animals. Pauper sch'els dus vesevan nus buobs che nus misslavan vaccas
ni cauras. Quei deva lu il detg exordi ed ei era da temer che las fridas
vegnien anavos tier nus. Per Maria havevan ils animals, la natira ed ora-
vontut siu liug nativ Tschmut in plaz tut special en siu cor.

Tgeua eis ella vivida e tgeua eis ella ida. Possi ella ver anflau il ruaus en
in liug che stat ad ella silmeins aschi car sco Tschmut.

Cara Maria stai bein.